

Headline	Masyarakat berperanan penting bendung jangkitan HIV AIDS		
MediaTitle	Harian Ekspres (KK)		
Date	20 Dec 2016	Color	Full Color
Section	Tempatan	Circulation	25,055
Page No	2	Readership	75,165
Language	Malay	ArticleSize	296 cm <sup>2</sup>
Journalist	N/A	AdValue	RM 1,525
Frequency	Daily (EM)	PR Value	RM 4,575



RONALD (ketiga dari kiri) dan Christina (kedua dari kiri) melepaskan belon sebagai simbolik pelancaran sambutan itu.

## Masyarakat berperanan penting bendung jangkitan HIV/AIDS

### Mardinah Jikur

**BELURAN:** Masyarakat memainkan peranan penting dalam membendung jangkitan HIV/AIDS terutama dalam usaha menurunkan jangkitan baru.

Ahli Parlimen Beluran, Datuk Seri Dr. Ronald Kiandee, berkata kesedaran dan pengetahuan yang ada akan dapat memperkasakan masyarakat dan individu.

"Ia juga dalam memastikan tindakan pencegahan sewajarnya dapat diambil dalam membendung jangkitan HIV/AIDS," katanya.

Di Malaysia, sepanjang tempoh Januari hingga September tahun lepas, sebanyak 2,455 kes baharu jangkitan HIV/AIDS dilaporkan ke Kementerian Kesihatan.

Menurutnya secara amnya, jangkitan HIV/AIDS di negara ini berjaya dikurangkan walaupun epidemik ini kekal mendatar sejak 2010 dan dijangka akan terus mendatar sehingga 2030 dengan aktiviti pencegahan dan kawalan sedia ada.

Beliau yang juga Timbalan Yang Dipertua Dewan Rakyat berkata ini bermakna dianggarkan sebanyak 3,000 kes baharu HIV/AIDS akan terus dilaporkan setiap tahun sehingga 2030 jika tiada tindakan peningkatan dilakukan.

"Justeru itu, kita harus maju ke hadapan dan mengambil inisiatif baharu dalam usaha berterusan mengekang jangkitan HIV," katanya. Ronald berkata demikian ketika merasmikan sambutan Hari AIDS Sedunia 2016 peringkat negeri di Pekan Beluran, baru-baru ini.

Turut hadir ialah Pengarah Jabatan Kesihatan Sabah, Datuk Dr. Christina Rundi.

Dalam pada itu, Ronald berkata, adalah bukan satu tugas yang mudah dalam mengakhiri AIDS.

"Tetapi, dengan kepimpinan, komitmen dan kerjasama pelbagai pihak, impian itu boleh menjadi kenyataan," katanya.

Menurutnya kerajaan pada dasarnya akan terus menerajui kepimpinan dan memberikan komitmen dalam menangani HIV/AIDS.

Malahan kerajaan juga bertekad akan terus menjadi penyumbang dana terbesar dalam membiayai pelaksanaan program pencegahan dan kawalan HIV.

Ronald menambah, kerajaan juga mengalutalukan penglibatan yang lebih aktif dan sumbangan dana yang lebih bermakna dari badan korporat khususnya kepada pertubuhan bukan kerajaan dalam melaksanakan aktiviti pencegahan dan kawalan HIV/AIDS.